

BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Komisija za ljudska prava, imigraciju, izbjeglice i azil

Broj: 01/5-011-499/01.

Sarajevo, 28. avgusta 2001.

Z A P I S N I K

Sa 7. sjednice Komisije za ljudska prava, imigraciju, izbjeglice i azil,
Održane 28. avgusta 2001. godine

Sjednica je počela s radom u 11 sati. Prisustvovali su: Osman Brka, predsjedavajući Komisije, Miloš Jovanović i Miro Grabovac – Titan, zamjenici predsjedavajućeg, Muhamed Begović, Omer Filipović, Bahrija Osmanović, Violeta Kamberović i Dušan Stokić, članovi Komisije. Odsustvovao je Mustafa Cuplov.

Sjednici su prisustvovali Slobodan Nagradić, pomoćnik ministra za ljudska prava i izbjeglice i Sena Hatibović, pomoćnik ministra vanjske trgovine i ekonomskih odnosa.

Predsjedavajući Komisije Osman Brka predložio je dnevni red kako su članovi Komisije dobili u pozivu za sjednicu, s tim da se skida razmatranje Prijedloga zakona o zaštiti ličnih podataka iz razloga što ga još nije razmatrala Ustavno-pravna komisija.

Zamjenik predsjedavajućeg Miro Grabaovac Titan predložio je da se u dnevni red uvrsti rasprava u vezi s podizanjem optužnice protiv Ante Jelavića i još nekih dužnosnika HDZ-a.

Povodom iznesenog prijedloga diskutovali su svi članovi Komisije, a potom je, sa pet glasova ZA i tri suzdržana, usvojen sljedeći

D N E V N I R E D:

1. Usvajanje Zapisnika s 6. sjednice Komisije,
2. Razmatranje Prijedloga zakona o pravima nacionalnih manjina u Bosni i Hercegovini,
3. Razmatranje Prijedloga zakona o zaštiti potrošača u Bosni i Hercegovini,
4. Utvrđivanje prijedloga rezolucije u vezi s nestalim osobama na teritoriji Bosne i Hercegovine,
5. Utvrđivanje plana posjeta Komisije određenim mjestima u Bosni i Hercegovini,
6. Informacija o žalbama i predstavkama građana,
7. Prijedlog zamjenika predsjedavajućeg Komisije da se od strane Komisije prati tok suđenja Ante Jelaviću i drugim i
8. Tekuća pitanja.

Ad – 1: Usvajanje Zapisnika s 6. sjednice Komisije

Zapisnik s 6. sjednice Komisije usvojen je jednoglasno, bez primjedbi.

Ad – 2: Razmatranje Prijedloga zakona o pravima nacionalnih manjina u Bosni i Hercegovini

Pomoćnik ministra za ljudska prava i izbjeglice Slobodan Nagrađić ukratko je dao obrazloženje Prijedloga zakona. Upoznao je Komisiju da je predloženi zakon bio i na javnoj raspravi, te da je iz javne rasprave proisteklo više primjedbi. Na upit predsjedavajućeg Komisije – jesu li primjedbe ugrađene u Prijedlog zakona, odgovorio je da nisu, ali da je Vijeće ministara zaključilo da se sve primjedbe dostave poslanicima.

Iz razloga što Komisija nije dobila primjedbe iz javne rasprave, predsjedavajući Komisije je konstatovao da se Komisija na ovoj sjednici ne može odrediti prema zakonu.

Zaključeno je da se razmatranje Prijedloga zakona u Komisiji odgodi, a da se od Vijeća ministara zatraži da se odredi prema primjedbama iz javne rasprave, te da svoj stav i primjedbe dostavi Parlamentu, nakon čega će Komisija uzeti predloženi zakon u razmatranje.

Ad – 3: Razmatranje Prijedloga zakona o zaštiti potrošača u BiH

Predsjedavajući Komisije konstatovao je da su na Prijedlog zakona do sjednice Komisije amandmane podnijeli poslanici Mediha Filipović i Halil Mehtić, koji su potpuno identični.

U ime predlagača obrazloženje Prijedloga zakona podnijela je Sena Hatibović.

U vezi s amandmanima izjasnila se da se amandmani mogu prihvatiti.

Članovi Komisije nisu imali primjedbi na predloženi zakon.

Komisija je jednoglasno prihvatila Prijedlog zakona o zaštiti potrošača u BiH s amandmanima poslanika Medihe Filipović i Halila Mehtića.

Ad – 4: Rasprava o prijedlogu rezolucije u vezi s nestalim osobama na teritoriji Bosne i Hercegovine

Predsjedavajući Komisije Osman Brka u uvodu upoznao je Komisiju da je njegova zamisao bila da Komisija bude predlagač rezolucije, ali s obzirom da Poslovnik propisuje da rezoluciju može podnijeti poslanik, na sebe je preuzeo ulogu predlagača, te je predlaže Komisiji na raspravu radi davanja podrške. Predložio je da se Domu predloži tačka dnevnog reda pod nazivom: Rasprava o nestalim osobama u BiH.

Skrenuo je pažnju članovima Komisije da u vezi s cifrom nestalih osoba postoji razlika između Međunarodnog komiteta Crvenog krsta i Državne komisije za traženje nestalih osoba, iz razloga što je kod MKCK kriterijum da nestale može prijaviti samo član uže porodice, a ima porodica koje su potpuno nestale.

Predsjedavajući je pozvao članove Komisije da daju sugestije u cilju poboljšanja teksta Prijedloga rezolucije.

Miro Grabovac – Titan je sugerisao da se u tačku 3. upiše i ministarstva za boračka pitanja.

Uz prednju sugestiju Komisija je Rezoluciju jednoglasno podržala.

Ad – 5: Utvrđivanje plana posjeta Komisije određenim opštinama u Bosni i Hercegovini

U uvodu predsjedavajući Komisije rekao je, pored ostalog, da su posjete koje je Komisija učinila u mjesecu maju jednom broju opština, bile vrlo značajne, te da bi bilo dobro da se ponovo organizuju takve posjete drugim opštinama. Pozvao je članove Komisije da daju prijedloge i sugestije gdje bi bilo najprioritetnije izvršiti posjetu.

U diskusiji su učestvovali svi članovi Komisije, kojom prilikom je izneseno niz pojava koje ukazuju na narušavanje osnovnih ljudskih prava. Izneseni su i prijedlozi gdje bi bilo prioritetno da Komisija učini posjetu.

Poslije diskusije zaključeno je sljedeće:

1. Da se formiraju tri grupe od po tri člana Komisije i organizuju posjete, kako slijedi:
 - a) Prva grupa u sastavu: Osman Brka, Miloš Jovanović i Violeta Kamberović, da posjete Srednjo-bosanski kanton – Banju Luku i Kotor Varoš;
 - b) Druga grupa u sastavu: Muhamed Begović, Dušan Stokić i Miro Grabovac – Titan, da posjeti Tuzlanski kanton i Doboj (Kotorsko) i
 - c) Treća grupa u sastavu: Omer Filipović, Bahrija Osmanović i Mustafa Cuplov, da posjete Foču, Istočnu Hercegovinu (Gacko, Bileću, Trebinje) i Hercegovačko-neretvanski kanton (Stolac).
2. Da se sačini metodologija posjeta kako bi članovi Komisije nastupali ciljno i jedinstveno, a ne po svom nahođenju.

Ad – 6: Informacija o žalbama i predstavkama građana

Violeta Kamberović je podsjetila da je prilikom posjete Drvaru u maju mjesecu dobila nekoliko žalbi građana koje je predala sekretaru Komisije, te da bi se trebale i te žalbe naći u Informaciji.

Povodom ove primjedbe zaključeno je da se te žalbe uzmu u rad, tj. da se po njima postupa kao i sa žalbama koje sadrži informacija, kao da su direktno upućene Komisiji.

Bahrija Osmanović je istakla da je Komisija uspješno i ažurno djelovala po svim prispjelim žalbama, te da su zahvaljujući interveniciji Komisije po žalbi grupe ljekara iz Doma zdravlja Lukavac poništene nepravilno dodijeljene specijalizacije.

Povodom informacije kratko su diskutovali i gospoda Muhamed Begović i Omer Filipović.

Komisija je jednoglasno podržala Informaciju.

Ad – 7: Prijedlog zamjenika predsjedavajućeg Komisije da se od strane Komisije prati tok suđenja Anti Jelaviću i drugim

G-din Miro Grabovac – Titan, pored ostalog, rekao je da je njegov lični stav, kao i stav Kluba HDZ-a, da se u konkretnom slučaju radi o političkom suđenju, jer je optužnica

podignuta zbog političkih izjava, te da sumnja u objektivnost suda. Zato traži da ga Komisija ovlasti da putem prisustva saslušanjima prati tok postupka.

Dušan Stokić i Miloš Jovanović podržali su zahtjev Mire Grabovca.

Bahrija Osmanović se ogradila od ovog zahtjeva i izrazila mišljenje da se radi o sudskom postupku, te da sud treba da bude potpuno nezavisn. Zbog toga ne daje svoj pristanak da se Komisija ni na koji način uključuje u tok suđenja.

Violeta Kamberović je izrazila svoje mišljenje da nema ništa protiv da članovi Komisije prate suđenje, ali da to ne bude samo g-din Grabovac, već dva-tri člana Komisije.

Muhamed Begović je naglasio da ne zna kakva je praksa suda u ovom pogledu, te da se to usmeno provjeri.

Osman Brka je izrazio bojazan da Komisija ne uđe ovim u probleme jer bi se moglo shvatiti kao pritisak na sud i miješanje u tok postupka.

Nakon diskusije, u kojoj su učestvovali svi članovi Komisije, većinom prisutnih Komisija se složila da tok suđenja prate predsjedavajući i njegovi zamjenici, a prethodno da se usmeno Sud konsultuje o načinu na koji će im se to omogućiti.

Ad – 7: Tekuća pitanja


G-đa Bahrija Osmanović je pokrenula inicijativu da Komisija putem nadležnih organa pokrene pitanje osiguranja državljana BiH koji rade na crno kod međunarodnih organizacija i drugih poslodavaca, kako bi se i za njih plaćali obavezni doprinosi u fondove penzijskog i zdravstvenog osiguranja, kao i za druge fondove. Istakla je da se ovakvim načinom od strane poslodavaca krše zakoni, što treba spriječiti.

U diskusiji su učestvovali Osman Brka i Miro Grabovac.

Zaključeno je da se od Vijeća ministara zatraži informacija u vezi s iznesenim problemom, a potom traži rasprava u Predstavničkom domu.

SEKRETAR KOMISIJE

Rajka Stanišić



PREDSJEDAVAJUĆI KOMISIJE

Osman Brka

